

欽定剿平粵匪方略

欽定勦平粵匪方略卷二百十 戊午年

十一月十一日 壬午 德興阿奏言查成明等進攻

六合兵勇雖有六千而自陳板橋至六合縣城  
徧地皆賊謀報官軍上月連獲勝仗之後六合  
添賊三千餘名且有浦口江浦逆黨時相接應  
臣已商鞠殿華酌帶兵勇親赴儀六交界察看  
地勢步步爲營會同成明等進勦據和春咨稱

浙師朱承先等兵勇五千已飭分路過江此軍  
到齊卽將六合四面圍攻兼以銳師截其西路  
之援俟各路調撥之兵大集布置俱定臣再移  
營前進又查揚城東有下河爲江南產米之區  
西有甘泉諸山緊接滁州六合山徑紛歧賊可  
路路窺襲北則高寶長淮尤爲直北山東第一  
門戶是揚州三面均宜設防現留毛三元與總

兵安勇等督帶兵勇分紮郡城西北各門所有  
撥守萬福橋邵伯之兵勇俱可聯絡臣仍紮營  
五臺山於揚城六合等處均可策應現在臣病  
已愈鞠殿華傷痕亦痊均可努力前進惟有痛  
自刻責力加奮勉早克一日城池卽早減一分  
罪戾

德興阿又奏言正在拜摺間接知縣楊鍾琛飛

稟朱承先等兵勇因高涇灣沘黃池等處賊勢  
緊急不能北渡等語臣思朱承先等如不能到  
江北兵力過單實深焦急惟有鞠殿華帶兵馳  
赴儀六交界會同成明等偪攻六合一面飛飭  
楊鍾琛探明覈辦奏入

上命軍機大臣傳諭德興阿鞠殿華成明毛三元曰六  
合賊勢鴟張亟應迅速進兵卽朱承先等一時未能

遽到該大臣亦豈能專待此軍株守揚州不思振作  
據稱鞠殿華等已帶兵馳赴儀徵六合交界該大臣  
統轄全軍正當親督重兵移營進剿爲鞠殿華後路  
聲援現在揚州郡城已留毛三元及安勇等兵勇分  
紮足資堵禦該大臣惟當迅速拔營前進督飭成明  
等共擣六合迅圖恢復以贖前愆不得專待南岸援  
軍致誤事機

同日都興阿奏言安慶各營撤至宿松賊卽隨後大至其勢甚衆前敵官軍兩路分紮實形單薄前自李續賓三河失利卽疊經催調援兵舒保馬隊由武昌起程至今半月有餘尙未趕到臣所部僅霆字等十餘營步隊實屬不敷堵剿屢將待援情形飛咨總督官文惟相隔較遠於前敵盼援情形未能迅悉卽如前此分兵援皖

若有胡林翼督辦調遣李續賓亦不至深入失利可否仰懇

天恩迅飭胡林翼趕赴湖北軍營扼駐黃梅一帶居中調度庶於楚皖軍情均有裨益奏入

上命軍機大臣傳諭官文胡林翼都興阿曰都興阿撤安慶之圍馳赴宿松後賊隨大至情形危急胡林翼前在湖北調度各軍悉合機宜此時該署撫諒已到



省卽著前往黃梅一帶駐紮將撥兵籌餉各事宜妥爲督辦至都興阿身任將軍且係幫辦軍務除所部各營外其餘兵勇亦應聽其調度所有舒保李續宜等馬步各軍早經官文派出赴援何以日久不至卽著該將軍速行催提前赴宿太一路協力攻剿儻有耽延不進以致貽誤機宜者卽著從嚴叅奏

同日駱秉章奏言兵機因賊勢而生苟事會在

所宜乘卽機宜未容稍滯臣請以目前局勢言之李續賓率師援皖一月連克四縣軍聲甚振嗣因進規廬州親率所部先攻三河僞城亦已獲勝逆首陳玉城率大股援賊倏至李續賓縱橫血戰力竭而敗現圍安慶之水陸各軍恐難支持是皖省事勢最急而勦之不可以緩也逆首石達開由浙竄閩以後氣勢頓衰張運蘭劉

長佑斬馘數萬入閩之賊掠食維艱解散漸衆  
賊勢愈趨愈南將及泉漳潮州一帶此數郡者  
民風素勁地勢有險可憑如能激勵士民共相  
聯絡而以官軍數路蹙之無難歲事是閩省事  
勢稍緩而勦之尙可不急也曾國藩先擬從雲  
際關入繼知賊已南趨恐其回竄江西改由建  
昌截勦乃賊知官軍將至復轉而東趨曾國藩

現分遣張運蘭蕭啟江率所部兩道入閩將窮  
賊所向殲之然當賊勢衰微之時閩粵督臣任  
勦之事江西撫臣任防之事似亦力尙有餘何  
須客軍遠涉且以大局言之皖省居江淮之中  
毗連數省南北東西橫決四出皆足爲腹心之  
患迴非閩廣僻在一隅者比李續賓未敗尙可  
期次第翦除肅清全境今則軍威已挫賊勢更

張勝保袁甲三翁同書皆有賊衆兵單之慮其  
急宜增軍速勦固已無疑曾國藩所部均是百  
戰之餘而由鄂援皖之軍又多其舊部若調之  
赴皖收召李續賓所部各軍並選調鄂省各軍  
厚集其勢則勝保袁甲三遏其北曾國藩扼其  
南自可力挫兇鋒而豫操勝算其道員蕭啟江  
所部四千人仍留江西擇要防守合無仰懇

天恩迅飭曾國藩察看緩急情形妥爲籌辦庶於東南  
上游大局有裨奏入

上命軍機大臣傳諭曾國藩曰李續賓一軍進攻三河  
全軍失陷都興阿圍攻安慶之師亦經撤回宿松一  
帶皖北賊勢颶張楚省邊防喫緊諒曾國藩亦必有  
探報此時閩省之賊已南趨漳泉距江西漸遠若照  
駱秉章所請令該侍郎移師赴皖而留蕭啟江防守

江西亦未始非權衡緩急之計惟曾國藩所部各軍多染疾疫前奏尙須休息景德鎮尙有大股逆匪隨剿隨進亦非計日可到著曾國藩豫爲籌度如果閩省賊匪本省兵勇足資剿辦而江西邊境防剿有人自以赴援皖省爲要不但廬州省城可收南北夾攻之效卽上竄湖北之路亦可藉資堵扼儘因汀州甯化等處尙須兵力一時不能移軍或須俟景德股匪

殲除再回楚北亦著斟酌具奏

十四日酉乙王懿德奏言前因江北浦口失利飭

令馮日坤等統帶兵勇先行馳赴金陵茲聞江北軍情日緊需援甚急總兵周天培已飛飭兼程前進惟延平府屬順昌將樂等縣餘匪未盡殲除據汀漳龍道英樸稟稱汀屬賊營數十里上杭縣城被賊圍攻周天培一軍遽行回援江



比則延建邵三府勢必震動臣卽飭總兵饒廷  
選由延平取道赴汀督勦汀漳龍道英樸由漳  
州進兵侍郎曾國藩已派道員張運蘭由邵武  
杉關進勦似此分路兜擊當不難痛加勦洗克  
復各城所有原調赴汀援勦之潮州鎮壽山所  
統兵勇二千已派守備方玉雲帶勇馳抵上杭  
駐紮東關外地方相機勦辦其將樂順昌等處

餘匪並經飭令遊擊黃禮鈐會同護理延建邵  
道潘駿章嚴督在事員弁兵勇趕緊搜捕臣一  
面仍咨商會國藩妥籌會剿至周天培由浙援  
閩克復浦城水吉建陽等處旋經移師洋口一  
帶連日苦戰疊獲勝仗攻拔賊巢暨克復順昌  
縣城行軍穩練進止有法洵爲提鎮中不可多  
得之員合無仰懇

天恩俯准量予優獎之處出自

鴻慈奏入

上諭內閣曰雲南鶴麗鎮總兵周天培由浙江赴援閩省克復浦城水吉建陽順昌等處洵屬著有勞績著遇有提督缺出提奏

同日胡興仁奏言臣疊據提臣鄧紹良咨稱蕪逆糾合江北大股賊匪分竄甯防十月二十七

日和尙橋一帶之賊竄踞清涼渡等處逼近灣  
沚其馬隊衝至李家渡營盤我軍列陣以待該  
逆未敢涉淺二十八日逆衆大股於灣沚牽掣  
另股五六隊每隊約千餘人從灣沚對岸至盤  
龍甸一帶已在灣沚後面爲灣黃適中之地逆  
衆旣經聯營情甚叵測刻下灣沚孤軍獨立僅  
能力圖守禦非有大兵接應不足以資攻勦等

語臣查皖南甯國南陵等處爲江浙兩省門戶  
現在高瀋告警金陵大營卽使有兵可援亦恐  
緩不濟急適遊擊馮日坤所帶兵勇到杭臣卽  
飭由四安前赴甯國聽候鄧紹良調遣十一月  
初二日周天培帶兵勇三千二百餘人亦由閩  
到杭臣亦咨令取道四安會同鄧紹良勦辦俟  
甯防稍靖卽令馳赴金陵較之金陵援師更爲

聞

便捷奏入報

十七日戊子官文都興阿奏言臣都興阿所部鮑

超霆字五營紮於二郎河多隆阿精選開化等

營紮宿松相隔三十餘里中間以馬隊往來梭

巡聯絡十一月初六日探知逆賊竄至花涼亭

二十五里墩荆橋一帶築壘偏近各路官營不

戰必致坐困是日晚閒多隆阿探知荊橋賊勢  
稍緩潛率精選開化等營銜枚疾進馳至二郎  
河會合霆營由車谷嶺調石清吉飛虎三營分  
道進剿花涼亭一路臣都興阿率馬隊設伏而  
進我軍部署甫定賊已大股分布數十層緣互  
二十餘里蠡擁來撲多隆阿等分途迎擊鏖戰  
逾時勇氣倍增埋伏馬隊一路繞山右橫衝一

路迎前直突馳過賊壘之後燒燬後路賊壘及  
賊踞村莊數十處殲賊匪甚夥前敵賊陣漸  
亂步隊乘勢攻擊賊潰竄山谷遂將花涼亭一  
帶賊壘全行削平馬隊追殺三十餘里一路賊  
壘悉行踏平計殺賊七八千逃散裹脅亦數千  
名生擒五百餘名是晚多隆阿恐宿松空虛連  
夜仍回宿松次日黎明向荊橋一路排開隊伍



以壯聲威所有陣亡之卽補協領穆精阿等合  
無仰懇

天恩從優賜卹奏入

上諭內閣曰此次勦賊陣亡之黑龍江卽補協領穆精  
阿委防禦恩科巴雅爾披甲凌春從征數載各著勞  
績茲以臨陣捐軀殊堪憫惻均著交部從優議卹

同日耆齡奏言福建甯化縣逆匪分股擾及石

城縣境該縣知縣張鎔派練勇往勦殺賊一百二十餘名餘匪敗回甯化又追殺三十餘人九月初十日甯化賊匪約近萬人竄擾石城縣橫江地方另股賊匪七八千人直撲石城縣城經官軍擊敗該逆擁衆萬餘圍攻西南兩門張鎔等豫伏兵於近城地面章越峯等出西南二門迎戰許朝金等伏勇齊出兩路夾攻斃賊三百

七十餘人該逆望甯化遁去我軍追逐十餘里  
殺賊三十餘人城圍立解是日申刻甯化股匪  
八九千人竄至石城縣前江地方復圍縣城又  
爲我軍擊敗竄往瑞金之湖陂一帶署知縣章  
澍調勇迎擊賊甫敗退詎福建汀州逆匪山篁  
竹嶺小路徑撲縣城防城兵力無多以致被賊  
攻陷先敗之賊亦復折回與城內之賊同攻章

澍等營盤章澍等奮力衝殺退駐石水灣該逆  
復擾及會昌縣西岡一帶逼近雩都縣情形均  
甚喫重現經臣飛催參將遮克敦布並額南鎮  
道督飭兵勇兼程進剿並經會國藩派蕭啟江  
一軍由廣昌石城進攻瑞金務期迅速掃蕩收  
復城池所有署瑞金縣知縣章澍署把總尹士  
寅失守縣城防範不力請

有將章澍尹士寅一併先行革職留於地方責令帶罪  
圖功奏八

上諭內閣曰福建甯化賊匪分股圖擾江西石城縣境  
復竄瑞金之湖陂一帶縣城被陷著耆齡迅速派員  
會同曾國藩等合力進剿剋期收復城池署瑞金縣  
知縣章澍署把總尹士寅失守縣城雖因衆寡不敵  
究屬疏於防範均著先行革職留於該地方帶罪效

力

者齡又奏言八月十五日劉于瀋督軍進紮離  
景德鎮三十里之鱖魚山河水陡漲卽率師船  
馳抵景德鎮賊水路出拒我軍一鼓直前斃賊  
數十人次日該逆由西岸來撲官軍營盤各營  
出擊賊卽飛奔回鎮九月十五日賊衆四五千  
人分路來犯我軍亦分投截擊各勇連斃悍賊

十餘人餘匪敗遁十六日賊分三大股傾巢而出劉于涪分撥各營迎戰蔡亮和等出禦中路之賊衆寡不敵相繼挫退傳承雲等堅守營牆礮斃數賊賊不敢近東岸長勝營朱洪章率勇渡河橫截河邊一股賊勢稍卻中路之賊亦歸併河邊拒敵並欲分股渡河阻我後路各營大礮齊轟扼住渡口萬泰率九江兵過河助戰三

路齊進立將河邊大股擊敗其裏鄉一股經蔡  
康業等張翼而進斃賊甚多追逐十餘里而還  
二十二日賊衆二三千人由東路出撲吳開嶺  
營卡營官謝得龍卽率前左中三營會合樂平  
團勇馳至小里地方鼓譟直前賊勢稍卻少頃  
復來衝撲各勇奮力迎戰回合十餘次賊衝我  
軍不動分股繞出金雞壩圖抄我後白天佑率



領右營中途邀擊殲戮甚多賊敗歸併大敗  
軍乘機衝入立斃悍賊數十  
二十四日劉于濱  
派軍由東路進攻自督親軍由西路沿河兩岸  
並進力戰良久山坳突出另股抄襲段起等將  
賊擊退詎左右山內又有伏賊來抄朱洪章率  
長勝營自東岸進將賊擊敗追至景德鎮對岸  
西岸之賊悉衆渡河長勝營及安旅軍均被圍

因水勇舍划登岸與長勝營合力衝出重圍幸  
值東路各軍偪攻鎮後賊全股退回救應我軍  
直前追擊將馬鞍山賊卡四座焚燒忽大股賊  
匪二千餘人由山後抄來謝得龍奮勇督戰被  
賊矛傷四處各營竭力抵禦將賊衆擊走計殺  
斃賊五百餘人臣查景德鎮之賊不下二萬餘  
人道員劉于滄疊次攻勦尙未得手亟應添調

重兵會勦知縣丁峻所帶彰武軍奇兵營尙稱  
精勁業經臣調往協助以期會同扼剿俾固三  
省邊防藍翎千總張桂林縣丞樊俊臨陣捐軀  
應請

飭部從優議卹奏入

上從之

二十日 辛卯 胡興仁奏言燕逆從五里亭進竄經

參將吳再升等迎擊頗有斬獲同時小萬山之賊撲犯孤山壩派隊馳往策應仲孫懋從方村助剿戰至亥刻賊始潰走十月二十一日賊撲長山營盤經吳再升等擊敗郭定猷等禦賊於五里亭而峨橋之賊乘虛竄擾石碓另股賊衆結壘孤山分犯楚營復有賊匪一股逼近鴉山次日王鼎甲首先擊賊身受二傷曹興隆等陣

亡營盤不守維時鴉山路阻灣防同時危迫鄧  
紹良督帶楚兵赴沿河山路堵禦一面飛飭岑  
興朝石玉龍協助其鴉山一路當飭石碓防營  
及吳全美水師就近策應二十三日鴉山鏖戰  
竟日該逆恃衆相持我軍傷亡甚多吳再升等  
潰圍殺出引兵移紮魯港始得聯絡水師會剿  
至黃池各路蕭知音等分路進兵將賊船燔燬

數隻斃賊百餘名賊由烏溪來犯黃宿渡劉仁  
福等出營擊退次日雁翅陡門亦有賊馬衝至  
經勇練擊散二十六日賊分三路來犯都司劉  
仁祿等陣斬賊目數名賊始敗退仍咨鄧紹良  
激勵將士奮勇攻勦力圖守禦所有陣亡之遊  
擊曹興隆等應請

飭部從優議卹奏入

上諭內閣曰此次力戰陣亡之遊擊曹興隆鄭士騶五品軍功田有藩均著交部從優議卹

二十一日壬辰官文奏言臣探知李續賓三河失

利之信當卽飛調參將余際昌一軍由霍山進發馳赴桐城應援又調副都統舒保侯選道李續宜兩軍馳赴黃州接應前敵又截留援淮之糧儲道唐訓方參將阿達春一軍由霍山折轉

潛太一路前赴桐城勦辦自都興阿退紮宿松  
後臣已先飭李續宜撥副將成大吉等軍二千  
餘人又湘左等營二千餘人會合舒保等馬隊  
馳赴宿松而逆眾蓄謀上犯楚境連毗皖地頭  
頭是道臣因令李續宜駐軍黃州收集湘營潰  
勇重加整頓凡入楚最要之隘如蘄州之陳德  
園以唐訓方訓營駐之又蘄宿交界之小隘嶺



以阿達春一營駐之而令余際昌駐於英山蘄  
州蘄水之槐樹坳又令李續宜酌撥勇丁分駐  
廣濟之東北路又調駐襄之唐協和等馬步隊  
駐守麻城之要隘其各屬偏僻徑途則以本省  
紳團彌縫其闕又九江府小池口湖口等處先  
經臣飛調普承堯回駐巡防撥知府劉騰鶴一  
軍駐守彭澤該鎮等均已趕至防所惟大江縱

橫千餘里防範尤宜慎密亦經臣飛咨楊載福  
彭玉麟酌撥水師副將李成謀率所部紮武穴  
龍坪田家鎮以奇字等營分紮蘄州涇陽口道  
士湫黃石磯並於黃州以上至漢陽等處節節  
派船扼守以杜偷渡兼爲都興阿後路接應之  
師

官文又奏言楚軍東征入皖距鄂千有餘里調

兵馳援分投布置殆無虛日臣總制兩湖兼署  
撫篆於策應兵餉二事外地方公事更復繁重  
勢不能遠離省垣親督防勦是以前請

恩旨飭下胡林翼迅速來北接署巡撫事務昨接胡林

翼來緘知已由原籍益陽縣起程前來一俟到

省接署撫篆臣當與面商機宜且南勇多其舊

部胡林翼先可馳赴黃州整頓前敵奏入均報

聞

同日勝保翁同書奏言臣等探知捻逆南竄廬  
州另股尙在廬城迤北迤東等處屯聚紮營仍  
欲勾結粵逆同撲定遠經臣等商派營總莫爾  
賡額帶領馬隊前往扼剿復派穆騰阿張得勝  
等分帶馬步隊馳赴永康鎮鑪橋一帶以備橫  
截該逆歸路詎匪衆繞由僻路沿淮奔逃當派

馬隊追至懷遠南岸該匪悉數過河已飭殷家  
澗以西各處防軍聯絡各圩鄉團以堵爲勦但  
該逆出沒無常兵至卽遁兵撤卽來非有專辦  
大員駐以重兵不能制其死命臣等專盼新調  
川楚兵到方足以資分撥昨奉

諭旨又以李續賓三河失利川楚各兵已被楚北截留  
適據探稟張落刑大股水陸東竄聲言圖撲明

光盱眙意在斷我東路餉道臣等已飛飭穆騰  
阿統帶馬隊星赴岡子集要隘迎截臣勝保察  
看情形卽當前赴紅心驛親督堵剿又據西路  
探稱舒桐二城均復失陷李續賓之兵竟至大  
挫臣等統籌全局此時若以全力進攻廬郡當  
可力制粵氛無如北路捻燄仍熾一舉足卽躡  
我之後定遠恐不能支不得不以重兵先圍固

守定遠扼制南北賊衝而以餘力東西兼顧察  
看何路喫重卽向何路勦辦爲戰守皆備之計  
現在南北賊衆每一竄突動輒數萬臣等就現  
有兵力橫截其中已屬極力支持前請調之馬  
隊馬匹厯時半年之久僅到綏遠城官兵百名  
餘俱未到其奉

旨撥調之普承堯一軍頃接官文咨稱江西尙未照覆

一時無可指望惟有請

旨飭下官文將截留前項川楚官兵仍催令趕赴臣等  
軍營以資調遣並懇

飭將臣上次所請吉林黑龍江兩省額補兵丁迅速照  
數挑補兼程前來用資攻剿奏入

上命軍機大臣傳諭勝保翁同書曰皖省南路賊勢既  
張北路捻匪猖獗自非添調勁旅未易兼顧官文暫



留之湖南兵一千五百名四川兵一千名已屢諭官  
文察看楚省軍務稍鬆卽飭催川楚各軍赴皖至綏  
遠城馬隊曾據袁甲三奏將後起二百名撥赴勝保  
軍營而勝保止收到一百名其餘在何處逗留有無  
迷失著勝保等查明具奏現在復派關保由天津帶  
吉林黑龍江察哈爾兵一千七百五十名赴袁甲三  
徐宿軍營著勝保咨商袁甲三將截留之頭起綏遠

城兵三百名調赴皖營助勦其吉林黑龍江缺額兵  
丁甫諭景綸等挑補尙未覆奏遠道何能速到況爲  
數亦屬無多勝保等稍待數日湖北大隊必可到營  
彼時分投布置較易爲力

上又命軍機大臣傳諭官文曰前因勝保軍營兵力單  
薄諭令官文將截留之湖南四川官兵二千五百名  
俟西路稍鬆仍令馳赴勝保軍營茲據勝保奏稱南

北賊衆每一竄突動輒數萬該大臣現在定遠請飭  
官文將川楚官兵催令赴營等語勝保以重軍固守  
定遠扼制南北賊衝並兼顧東西兩路兵力不敷防  
剿自係實在情形楚北防守事宜官文已布置周備  
著卽體察近日軍情卽飭川楚官兵迅速前赴勝保  
軍營以資助剿其普承堯一軍已到九江如果有人接  
替著飭令一併迅赴勝保軍營先其所急以顧大局

二十二日已癸都與阿奏言臣所部宿松二郎河

各營營盤穩固刻下楓香驛之賊已退至蓮花  
塘一帶荆橋之賊已退至石牌一帶由官文調  
來劉連陞等八營援兵已飭其扼紮宿松派石  
清吉飛虎三營楊朝林精選前營由宿松車谷  
嶺移紮二十五里墩扼駐要隘至李續宜舒保  
現已止其前進卽扼駐上游以便各路探防奏

入報

二十三日甲午胡林翼奏言查李續賓所部各營

提師入皖一月之內攻克四城又復急援廬州  
兵以屢分而單氣以屢勝而洩是固兵家之深  
忌也破桐城後分營留守以數千之衆用之賊  
所必爭之地前無牽制援賊之兵後無彼此掎

角之勢百戰之餘覆於一旦良可痛惜李續賓  
忠勇剛烈其質直厚重與漢周勃相似臣與共  
事最久見其每戰必先不曾少卻一步且湘勇  
召募之始整齊樸實甲於諸軍而肅清兩湖平  
定江西其功亦冠於諸軍李續賓旣以身殉而  
同時陣亡之道員副將以及州縣千把不可勝  
計是則變起非常軍氣已寒非歲月之間所能

復振臣之才力何能補救於萬一惟時事艱難  
既未敢稍形推諉亦未可因假期未滿稍涉遲  
回現於十一月十三日起程馳赴鄂省仍在湖  
南選將募勇以爲後圖新募之勇勢難剋期而  
至若待成軍啟行仍恐貽誤事機臣卽一而先  
行馳往營中以期就近商辦呼應較靈至臣葬  
祭之事勿遽未畢容俟軍務完竣再行陳明奏

入報

二十四日乙未胡興仁奏言臣據鄧瀛稟稱沘防

一軍於十一月初十日出隊先勝後敗戴文英  
營盤被匪燒燬兵勇間有潰散鄧紹良大營亦  
已被圍情形甚屬危急請派周天培馳往救援  
等語臣查婺源未復徽防兵勇難以抽調周天



集二事 卷之四 三十一  
三  
培一軍於本月初五日過杭計期行抵蘇州若  
由江蘇之東壩建平取道甯國較爲便捷一俟  
灣黃圍解再赴金陵亦不至耽延時日奏入報

二十五日 丙申和春奏言據鄭魁士等稟稱探得

戴文英於初十日黎明由灣沚渡河攻勦逆營  
因賊匪大股分路抄撲我軍寡不敵衆驟難獲

勝仍悉力進攻詎料黃池之賊瞰我營壘空虛  
躡水潛渡襲破我營放火焚燒戴文英回兵馳  
救遂爲該逆所乘所部全潰大半退至甯國郡  
城鄧紹良營盤五座被圍聲息不通萬分危急  
鄧瀛以郡城現無主將卽請副將朱承先在城  
調度防守適遊擊馮日坤帶兵二千五百名自  
杭到郡卽令駐紮北門外以資守禦該郡文武

稟請飭派鄭魁士前往接應無如該鎮瘡疾之後舊傷復發實難啟行現已飛飭周天培馳赴甯郡力圖堵剿奏入

上命軍機大臣傳諭和春張國樑許乃釗曰甯國軍情萬分迫切此時卽須先解鄧紹良之圍一面保衛郡城以維大局鄭魁士旣因舊疾復發不能前往周天培諒已馳抵甯國該大臣等卽飭悉力應援鄧紹良

灣沚營盤與朱承先馮日坤等會同攻剿冀得轉危爲安以杜該逆內竄之路俟灣沚一帶情形稍鬆再調周天培等前赴金陵至高淳東壩均屬蘇常要道現有鄭魁士魯占鼇鎮守當可無虞仍著和春等隨時相機調度務保腹地勿令蔓延

和春又奏言查高淳東南爲東壩西南爲水陽鎮水陽之西爲烏溪又西爲黃池黃池西南爲

灣汴灣汴東南卽爲甯國郡城相距百餘里閒  
路路可通防不勝防鄭魁士聞該逆欲由烏溪  
進犯水陽以趨高淳卽飭副將朱承先帶兵往  
剿又分兩隊赴西陵門及唐溝等處往來巡哨  
十月二十五日逆匪竄至雁翅陡門地方當經  
官軍擊敗復有水陽鎮上奸匪縱火亂我軍心  
朱承先一面追賊一面派兵回鎮救火將奸細

拏獲正法人心始定戴文英於十一月初七日  
抵灣沚與鄧紹良會議後卽帶隊親歷各隘察  
看賊情遙見山巖有賊衆窺伺我軍卽密飭馬  
隊兩路抄圍副將向奎等衝上山梁斃賊甚多  
戴文英指揮將士從中路殺入賊勢披靡馬隊  
追擊十餘里斬馘甚多初八日又分三路進攻  
該逆於土山密布旗幟遊擊馮觀勝等帶中路

兵勇向奎等帶左路兵勇兩面夾擊戴文英親  
督守備羅大春等從右路策馬渡河以擊其後  
副將杜照瑞等亦分三路接應槍礮齊施短兵  
相接該逆抵死不退戴文英督同張克慎等直  
取賊首我軍乘勢掩殺該逆大股皆踉蹌回奔  
忽有賊黨數千從盤龍甸等處衝出阻我進兵  
參將陳步桂等從右抄出以敵之戴文英又揮

令參將姚爵階等伏於圩埂用劈山礮轟擊馮  
觀勝等縱馬衝入賊叢大隊乘之追至土橋攻  
克逆卡二道進薄賊巢斃賊不下千餘自十月  
望後善湖繁昌南陵之賊力圍孤山壩各營總  
兵吳全美從魯港防次帶水師登岸援勦雖屢  
獲勝仗而衆寡不敵該逆策小舟欲襲魯港吳  
全美聞信遂遄回水次遊擊吳再升一軍獨力



難支亦由鴉山移營與吳全美互相聯絡其石  
碓等處陸營亦皆移紮灣沚近地該逆遂由護  
駕墩官圩內犯灣沚危急旋又探知上游繁昌  
峨橋之賊與江北無爲州二擺渡及裕溪口等  
處之賊驟添數萬蠶擁南來愈集愈多鄧紹良  
戴文英請添援師臣等當調兵勇一千七百名  
飭參將鄧朝棟帶赴高淳由鄭魁士酌量策應

灣沚而皖南道府縣告急之文又復踵至因復  
飭總兵周天培一軍由常州取道赴甯防灣沚  
以固江浙兩省之防所有陣亡之千總羅東福  
外委楊森雲應請

飭部從優議卹奏入

上從之

二十六日丁酉德興阿奏言臣與鞠殿華馳往儀

徵二十里鋪各地方周視地勢俟成明鞠殿華  
之軍紮定後臣卽移營前進並派知府方長澤  
管帶勇丁長夫赴六合東路趕築各營原擬江  
南兵到隨臣進攻乃自十月以來據和春來咨  
知朱承先等兵勇因南岸喫緊不能撥來其周  
天培一軍經和春飭令前赴灣沚兩項兵勇難  
望北渡未敢專候此軍久稽進剿現將募勇二

三千名加意操練以補兵力之不及一俟營壘  
築定臣卽移營六合東路親督攻擣奏入

上命軍機大臣傳諭德興阿鞠殿華成明毛三元曰六  
合增營之地經該大臣親往察看此時朱承先周天  
培各軍均因甯國緊要不能移動卽著就所募新勇  
並現有兵力迅速拔營前進督飭成明等兵共擣六  
合若俟營壘築定始行進兵稽延時日徒誤事機德

興阿等僨軍失利不加嚴譴正望其建功贖罪儻再  
節節耽延豈能當此重咎耶

同日胡興仁奏言據委員王承楷稟報署提臣  
鄧紹良於本月十二日與賊接仗力竭陣亡等  
情臣接閱之下卽飛咨總兵鄭魁士就近赴甯  
收集散勇暫行統馭並咨和春何桂清先派周  
天培輕騎赴甯暨咨張芾周天受酌調援兵赴

勦此次賊竄皖南其勢甚衆必得威望素著之  
大員督兵攻勦方能有濟周天受於甯國最爲  
熟悉現因婺源牽掣鄭魁士現紮東壩係江蘇  
要地惟周天培一軍尙可移緩就急而江北又  
須助勦李定太謀勇兼優而衢防倚爲長城臣  
思維再四惟有咨請曾國藩派得力將官酌分  
勁勇四五千名由杉關馳回皖南飛調李元度

由江西趕至甯國四面會剿至鄧紹良督戰陣  
亡實屬忠勇可憫合無仰懇

天恩飭部從優議卹一面

簡派大員赴甯督剿以一事權浙江提督一缺懇

恩迅賜簡放奏入

上命軍機大臣傳諭和春張國樑許乃釗曰甯國爲江  
浙門戶鄧紹良一軍旣已敗潰恐朱承先馮日坤等

兵勇不敷堵剿周天培諒已馳抵甯國如果鄧紹良陣亡屬實著和春等一面馳奏一面傳旨將周天培署理浙江提督令其督辦甯國軍務迅將此股逆匪痛加剿洗毋令蔓延鄧紹良陣亡情形俟奏到時再行降旨賜卹甯國郡城是否尙保無虞著該大臣等迅速撥兵救援

二十九日

庚子

和春奏言灣沚軍營失陷以後據



副將向奎等稟稱戴文英與賊血戰刺斃無數  
賊匪槍矛蝟集該總兵於營中力竭陣亡當時  
軍心慌亂亦卽退回甯國郡城又據參將鄧聯  
科等稟報提督鄧紹良亦於十一日三更灣汊  
營盤被圍血戰殞命臣查鄧紹良自抵徽甯防  
勦五載屢復郡縣功績茂昭實爲皖南保障戴  
文英從征數載屢立戰功本年十月克復溧水

天恩將該提鎮

飭部從優議卹並於死事地方建立專祠其灣沚從亡

員弁俟臣查明再行奏懇議卹至甯國郡城節

據皖南道鄧瀛稟稱先令副將朱承先向奎於  
城中分守四門又令馮日坤於城外西北一路

安紮營壘並據朱承先等稟報各門外均已先  
後築營扼要堵守暫在郡城會同籌商防守事  
宜臣查甯郡防兵及所招潰散已不下一二萬  
人兵力已厚賊勢尙未內犯總兵鄭魁士歷練  
老成堪以就近前往督辦復飭周天培一軍暫  
留高淳駐紮並飭張玉良帶兵二千由溧水前  
往東壩會同魯占鰲嚴密防守以固蘇常門戶

派副將劉季三帶兵二千前赴溧水接防以資  
堵禦

和春又奏言查甯國府地居東南爲江浙兩省  
門戶堵禦防勦最關緊要必須威望素著謀勇  
兼優得力大員前往統率方足以資鎮攝總兵  
鄭魁士久歷戎行老成持重屢經大敵明幹有  
爲爲諸鎮中不可多得之員浙江提督員缺可

否以鄭魁士補授卽令督辦皖南軍務於軍事  
庶有裨益其安徽壽春鎮總兵並戴文英遺出  
直隸通永鎮總兵二缺查有參將熊天喜遊擊  
馮子材副將劉季三等三員出師數載屢著奇  
功可否卽於此三員內

簡放之處恭候

聖裁奏入

上命軍機大臣傳諭和春張國棟許乃釗曰前因胡興  
仁奏鄧紹良接仗陣亡諭令和春等如周天培已抵  
甯國卽傳旨令其署理浙江提督督辦甯國軍務本  
日據和春奏鄧紹良與戴文英先後陣亡該大臣因  
甯防緊要另片奏請以鄭魁士補授浙江提督卽責  
令督辦皖南軍務周天培一軍現留高淳駐紮該處  
亦爲腹地扼要之區該大臣等接奉廷寄曾否傳旨

將周天培署理浙江提督如尙未宣示卽著迅速馳奏候旨將鄭魁士簡放浙江提督並令在甯國接辦軍務其壽春鎮並通永鎮總兵兩缺統俟奏到時降旨簡放至溧水東壩等處均爲蘇常門戶並著該大臣等督飭防守之鎮將加意堵禦毋稍大意

上諭內閣曰浙江提督鄧紹良由湖南備弁帶兵剿賊洊歷專閫自桂林長沙力保危城戰功卓著前由江

南大營分兵赴援徽浙督辦甯國防勦五載以來疊復郡縣功績茂昭茲於濟沚地方與賊接仗力竭陣亡深堪憫惜著加恩照提督例從優議卹並於殉難地方建立專祠以慰忠魂伊子幾人有無官職著和春查明具奏

上又諭內閣曰直隸通永鎮總兵戴文英由廣東行伍從征數載洊升專閫埽蕩賊壘勞績尤著茲因帶兵



赴援甯國至灣沚地方力戰陣亡殊堪憫惜著照總  
兵例從優議卹並於殉難地方建立專祠